

Unreinigkeit. Seihe es ab/vnnd mische es vnter ein-
ander/vnnd siede den Ingwer darinnen/ biß er begin-
net zeh zu werden/behalt ihn in einem Krüglein/ver-
mache es wol das die Krafft darinnen bleib/vnnd je
länger es stehet/je besser es wird.

Ein anders/Ingwer einzumachen.

Nim Ingwer so viel du wilt / weiche es in Kalck/
vnnd scharpffe Laugen/ laß stehen 14. Tag lang/oder
biß es weich wird / nim ihn dann auß der Beiz/vnnd
schele die oberhaut herab/vnd stich die Ingwer voller
Löcher / mit einem spizigen Messerlein / weiche ihn
wider in ein frisch Wasser 14. Tag lang/gieß alle Tag
ein frisches daran / mach darnach ein Brüh darüber
mit Honig oder Zucker / vnnd wann er acht Tag in
der Brühe gelegen / so seihe es darvon / vnnd sieds
wieder.

Muscatnuß obbeschriebener massen einzumachen.

Nim Muscatnuß so viel du wilt/weiche sie in eine
gute scharpffe Laugen / gieß allweg vber den andern
Tag ein frische daran/ laß 14. Tag also weichen/ thu
die obern Schelffen davon / legs in ein frisch Was-
ser/biß die Laug davon kompt/ gib ihnen darnach den
gebürenden Zucker vnnd Honig / wie bey den Ein-
machungen der grünen Ingwern durch mancherley
Gattung verzeichnet ist.

N O T A.

Solcher gestalt mag man auch Zitwan/Balgant
vnd Calmuß einmachen.

Confect von Zimmet einzumachen.

Nim außgebissenen Zimmet 1. Loth/ Zucker 7. Loth/
sied den Zucker mit Rosenwasser wie du weißt/vnd so
er gesotten ist/rühre zu legt den Zimmet darein/vnnd
mach Zeltlein darauß.

3

Ein